

ZABOR BILKETA ZERBITZUA MANKOMUNATZEKO AKORDIOA

Zabor bilketa zerbitzua mankomunatzeko akordioa Udal Elkarteko Zuzendaritza Batzordeak 2016-12-01eko bileran aho batez onartua

- 2016ko urriaren 28an, Zuzendaritza Batzordeko kideei eta Udal Elkartea osatzen duten udaletako alkateei aurkeztu eta ondoren sortutako lantalde politiko eta teknikoak eginiko ekarpenekin osatutako azterketa teknikoa onartzea, honako irizpideekin:
 - Etxeko hondakinen bilketa: bost edukiontzi bidezko bilketa: errefusa, organikoa, papera-kartoia, ontzi arinak eta beira. Errefusa eta organikoaren edukiontzien erabilera mugatua izango dute, hau da, txip bidez irekiko dira. Horrez gain, etxebizitza bakoitzari bere edukiontzia izendatuko zaio. Txip bidez egunero ireki ahal izango da edukiontzia. Beste edukiontzien kasuan, gaur egungo sistemarekin jarraituko dugu.
 - Komertzioak eta ostalaritza: sortzaile handi eta ertainei gaikako bilketa zerbitzua eskainiko zaie, puntuz-puntu, honako frakzioak jasotzeko: organikoa, papera-kartoia eta errefusa. Komertzioei astean sei eguneko eskainiko zaie zerbitzua eta ostalariei zazpi eguneko. Ondorioz, ez dute txartel beharrik izango. Ontzi arinak eta beira jasotzeko kaleko edukiontziak erabiliko dituzte.
 - Enpresak: industrialdeetan puntuz puntu bilduko dira honako frakzioak: organikoa, errefusa, ontzi arinak, egurra, kartoia eta plastiko filma/poliespana. Jantokia duten enpresei hondakin organikoen sortzaile handiei aplikatzen zaien puntuz puntuko bilketa aplikatuko zaie.
 - Landa eremuari dagokionez, ekarpen gune berriak sortuko dira edukiontzi guztiekin. Aztertzekeo geratzen da hondakin organikoak jasotzeko edukiontzia gune guztietan jarri ala ez (nekazal turismoak, nekazal etxeak...).
- Bilketa sistema berri honek gutxieneko bilketa tasak hauek lortzeko bide izan behar du, urtez urte honela banatuta:
 - 2018an: %60.
 - 2019an: %60tik %70era.
 - 2020an: %70etik %75era.

Horiek gutxieneko helburuak dira, izan ere, helburua ahalik eta jasotze tasa altuena lortzea da (beste eskualde batzuetan gisa bereko sistema erabiliz %80ko jasotze tasara iritsi dira).
- Hondakinak gaika bereiztu eta sailkatzea betebeharrak bat da herritar ororentzat.
- Aurreko puntuan aipatutako portzentajeak lortzen ez badira, neurri zuzentzaileak aztertu eta bideratuko dira, kasuan kasu: errefusaren edukiontzia irekiera denboran mugatzea, edukiontzien erabilzaile kopurua mugatzea...
- Zerbitzuaren kostuak estaltzeko ezarriko diren tasak aztertzen direnean, hobari edota pizgarriak ezartzea baloratuko da zenbait kasutan: auzokonposta, autokonposta, ostalaritza, komertzioak, e.a. Halaber, tasak ezartzeko hainbat eredu daudela kontuan izanik (besteak beste, sortzen den hondakin kopuruaren arabera tasak ordaintzea), gaur egun herriz herri dauden ereduak hartzen ditugu oinarritzat, baina bat egiten dugu "gehien sortzen duenak gehiago ordaindu behar du" printzipioarekin.
- Errefusaren eta hondakin organikoen bilketek maiztasun berbera edukiko dute hasieran, nahiz eta jakin badakigun, bilketa sistemaren garapen egokiaren ondorioz, hondakin organikoaren bilketa maiztasuna igo egin beharko dela eta errefusarena jaitsi. Karakterizazioari dagokionez, urtean errefusaren



karakterizazioa hiru aldiz egingo da eta hondakin organikoarena lau aldiz (GHKren bitartez edo, bestela, Udal Elkartearen bitartez). Hondakin organikoari dagokionez, helburua da inpropio kopurua %5 baino txikiagoa izatea.

7. Jarriko diren edukiontzien, ahal den neurrian, irisgarritasuna bermatuko dute.
8. Sistema berria ezartzeko lanak egiteko, informazioa zabaltzeko eta sentsibilizazio kanpainak burutzeko, lau hezitzaile kontratatzea aurreikusten da: bi 2017ko ekainean kontratatuko lirateke eta beste biak 2017ko irailean (gutxiegia dela ikusten bada gehiago kontratatuko dira).
9. Hezitzaile horien lan eta eginkizuna izango da, besteak beste, herritarrak sentsibilizatzea, gune "ilunak" identifikatzea eta erabiltzaileei zuzenean ohartarazpenak egitea.
10. Sistema berriaren emaitza eta bilakaeraren inguruko datuak argitaratuko dira hilero Urola Kostako Udal Elkartearen webgunean, sistema berria martxan jartzen den egunetik hasita. Datu horiek udalerrri bakoitzean nola zabaldu udal bakoitzak erabakiko du: panelen bidez, web orrian....
11. Sistema berria ezarri eta lehen hiru hilabeteko datuak hartuta, aldizkari bat banatuko da etxez etxe bailara guztian, lortutako emaitzen eta gaika jasotako hondakinen kalitatearen berri emateko. Horrez gain, sistema martxan jarri eta 12 hilabetera lortutako emaitzak jarritako helburuetatik urrun baldin badaude, komunikazio kanpaina sakon bat egingo da. Bestalde, zabor tasaren ordainagiriarekin batera, sistema berriaren helburuak, jasotze tasaren datuak eta gisa bereko informazioa zabalduko da.
12. Bilketa sistema ezarri aurretik, beharrezko informazio euskarriak etxe guztietara bidaliko dira, funtzionamenduaz gain, markatu diren epe eta helburuak jakinarazteko. Sistema berria herritarrei azaltzeko, beharrezko diren bilerak egingo dira bost udalerriekin adostuta, prentsaren aurrean egingo diren aurkezpenez gain.
13. Lan Mahai Tekniko eta Politikoak jarraipena izango du, sistema berriaren inguruko gai desberdinak jorratzeko eremu gisa. Lan Mahai horretako kide dira bost udaletako teknikariak, EH Bilduko bi ordezkari, EAJ-ko bi ordezkari, Irabaziko ordezkaria, Orain plataformako ordezkaria, PSEko ordezkaria, Urola Kostako Udal Elkarteko teknikariak eta Udal Elkarteko lehendakaria.
14. Urola Kostako Udal Elkarteko Zuzendaritza Batzordeko kide garen udal ordezkariok konpromisoa hartzen dugu sortuta dauden hondakinen mahaien bilerak deitzeko, mahai horietan sistema berria aurkeztu eta prozesu honetan era aktiboan parte har dezaten (informazioa jaso, ekarpenak egin, jarraipena egin...).
15. Eskualdean lor daitezkeen aurrezpen ekonomikoa eta sor daitezkeen lanpostuak zehazteko, azterketa ekonomikoren beste aldaera bat landuko da, %80ko bilketa maila erreferentzia gisa hartuta.